



UNIVERSITÄTS-
BIBLIOTHEK
PADERBORN

Universitätsbibliothek Paderborn

Centvriæ Selectorvm Casvvm Conscientiæ. I. II. III.tia

Burghaber, Adam

Fribvrgi Brisgoiæ, 1665

98. Wilibrordvs Sacerdos diebus, quibus à nullo est mercede pro Sacro dicendo co[n]ductus, celebrat nihilominus pro eo, qui proximè numeratâ pecuniâ Sacrum est postulaturus; idque malè, si fructus ...

urn:nbn:de:hbz:466:1-40942

conscientia ad medietatem damni, quod nec Diana, nec vllus alius affirmare audebit.

XCVIII. *Wilibrordus Sacerdos ex mero stipendio pro Sacris accepto se sustentat; & si interdum neminem habet, qui ipsum mercede conducat, nihilominus illo die celebrat pro eo, qui proximè numeratâ pecuniâ Sacrum est postulaturus. Queritur. An licitè?*

Videtur licitè eum facere. Ita Petrus de Arragonia in 22. q. 85. art. 3. Dub. penult. Petrus Navarr. de Restitut. L. 2. c. 2. n. 373. Rodriguez, Henriquez & alij docti R. R. Moventur. Tum quia Wilibrordus, dum sacrificat, intentionem ita format, vt in acceptatione diuina fructus Sacrificij reseruetur ei, qui primus postulabit, eidemque postmodum applicetur, in quo nulla apparet repugnantia. Tū quia licet Sacrum illud sit præteritū respectu nostri, in DEI tamen acceptatione & æternitate perinde est præsens, ac si modò offerretur.

Resp. 1. Wilibrordum illicitè & invalidè fructum Sacrificij applicare sub prædictâ conditione futurâ. Ita Suarez, Vasquez Coninck & alij, quos refert & sequitur Palao Tr. 22. D. Vnic. pun. 6. n. 18. Ratio est, Tum quia contraria Sententia damnatur à Sac. Congreg. Concilij Trident. iussu Clementis VIII. tanquam pluribus nominibus periculosa, vt videre est apud Barbof. Part. 2. de Potestate Epif-

copi

copi Alleg. 24. n. 12. Tum quia Sacerdoti non est concessum applicare fructum Sacrificij quovis tempore, sed eo solùm, quo Christi personam gerit, cuius etiam nomine applicat, adeoque quando sacrificat. Atqui applicans sub conditione futura, non applicat fructum Sacrificij eo tēpore, quo Christi personā sustinet, sed ad tēpus advēturæ cōditionis reservat applicandum. Ergo non tantùm illicitè, sed etiam invalidè hoc applicationis modo vititur. Non obest, quod DEO omnia in æternitate præsentia sint; nam sicut fructus Sacri à Wilibrordo non fuit applicatus tunc, quando gerebat personam Christi, ita non potuit pro illo tempore esse præsens in æternitate, sed alio, quo personam illam iam deposuerat.

Resp. 2. Si Wilibrordus velit, ut fructus Sacri, dum istud fit, applicetur ei, quem DEVS novit, proximè numeratâ pecuniâ postulaturum, & validè & licitè illum applicare. Ita ferè Palao *loc cit.* Ratio prioris est, quia hæc applicatio absoluta est, & independens ab aliqua futura conditione; esto enim futurum contingens sit, quis nam primò Sacrum conducturus sit, attamen id DEVM novisse non est contingens futurum, sed præsens & necessarium, secundum quam præsentiam & necessitatem fructus Sacrificij applicatur, nec reservatur applicandus ad futuram conducti-
onem Sacrificij. Ratio posterioris est, quia à

Sac. Congreg. tantum damnatur & rejicitur applicatio conditionata & dependens ab aliquo futuro, qualis dependentia & conditio hic non interuenit. Confirmatur. Sacellanus, qui singulis hebdomadibus debet tria Sacra legere, potest licite hac hebdomade legere sex, vt nullum amplius debeat pro hebdomade sequenti, vt docent Barbof. *loc. cit. n. 14.* Riccius in *praxi Resolut. 338.* Reginaldus, Rodriguez, Lugo, Palao, & alij communiter, idque ideo quia in hoc casu fructus Sacrificij non suspenditur postmodum applicandus, sed statim applicatur iuxta intentionem presentem, certam, & determinatam, id quod non minus accidit etiam in casu nostro. Ergo eodem prorsus modo vtrumque licite fit.

Atque ex his patet ad argumenta contrariae Sententiae, cuius Authores, qui rite expenderit, non aliud in illis deprehendit, quam quod in 2. Responsione diximus, vt proinde contra veritatem, & declarationem Sacrae Congregationis nihil prorsus asserant.

XCIX. *Zebina mulier in graue lapsa est peccatum, quod praenimia verecundia non ausa exponere Confessario qualibet interim alia confitetur, donec a Religioso de integritate Confessionis magna vi ad populum dicente nota statuerit, integre confiteri, & malam verecundiam ponere. Queritur. Quam repetitionem peccatorum & confessionum a Zebina exigat Confessarius?* Vi-